

錦繡萬花谷

十二

刊錦繡萬花谷

十五冊

錦繡萬花谷卷第十二

左右史

書言動

動則左史書之言則右史書之

禮記

記言記事

古者天子左史記言右史記事

晉志注

起居注

起居郎曰左史起居舍人曰右史所書言動皆曰

起居注

左右史

文宗開成中始詔左右史立螭頭下

張弘靖傳

螭首

唐制天子御正殿起居郎居左舍人居右俯陛以

聽退而書之季終以授史官若仗在紫宸則夾香

案分立殿下直第二螭首

百官志

螭坳

直第二螭首和墨濡筆皆即坳處記錄于前

唐志

執筆螭頭

唐鄭朗為起居郎文宗與宰相議政適見朗執筆

螭頭下謂曰向所論亦記之乎朕將觀之朗曰故

事天子不觀史昔太宗欲觀之朱子奢曰史不隱

善不諱惡見之則史官無以自免不敢直筆帝統



謂宰相曰朗可謂善守職者 本傳
玉皇香案吏

元微之守越州以州宅誇白樂天詩曰我是玉皇
香案吏謫居猶得在蓬萊 元集

人瑞

唐鄭仁表爲起居郎文章俊拔恃才傲物嘗曰天
瑞有五色雲人瑞有鄭仁表 本傳

館閣

秘書監

桓帝延熹二年初置秘書監掌國史 東觀漢記

蓬萊仙室

學士稱東觀爲老氏藏室道家蓬萊山王融曲水
詩序曰紀言事於仙室謂藏室也又漢顯宗時學
者多稱東觀爲老氏藏室道家蓬萊山遵薦竇章
入東觀爲校書郎 章傳

東觀

班固著作於東觀

西觀

東哲除著作西觀修晉書 本傳

石渠閣

漢宣帝甘露中詔諸儒論五經於石渠閣閣在未
央宮殿北藏書之所也

白虎觀

漢章帝詔諸儒會白虎觀講五經同異作白虎通
議章帝紀

外臺內閣

魏薛夏卿曰蘭臺為外臺秘書為內閣臺閣一也
王肅

蘭臺麟臺

龍朔中改秘書省曰蘭臺武后垂拱中又改曰麟
臺唐志

改金根

退之子昶性闇劣為集賢校理史傳有金根車昶
以為悞悉改根字為銀字尚書故實

朋字未正

劉晏以神童為秘書正字上問曰正得幾字對曰
餘字皆正唯朋字未正明皇雜錄

延閣

武帝廣獻書之路書積如丘山故外有太常博士
之藏內有延閣廣內秘書之府劉歆七畧

書林

孝和亦數幸東觀覽閱書林
後儒林傳

國朝三館合為一

唐兩京皆有三館各三所逐館命修撰文字而本

朝三館合為一並在崇文殿中命修摠目則在本
院歸田錄

三館

昭文館集賢院史館 同上

六閣

太祖太宗宸翰所藏之閣名曰龍圖取龍馬負圖
之義也真宗藏宸翰之閣曰天章取雲漢為章之
義仁宗英宗藏宸翰之閣曰寶文閣取寶書為訓
之義神宗曰顯謨徽宗曰敷文哲宗曰徽猷此六
閣之所建也

二閣

仁宗景祐二年置邇英延義二閣邇英在迎陽門
之東北向延英在崇政殿西南向賈昌朝以書筵
進對為二閣記注命章得象等接續帝學

崇文院

史館唐正觀三年置有史館修撰直館之員集賢
院開元五年置麗正修書院十三年改為集賢書
院有學士侍講之名并有修撰校理直講之職正
元中增置校書正字梁都汴以長慶門東北小屋
數十間為三館湫隘喧雜有所撰述徙他所就之
太宗即位因臨幸周覽曰若此之陋何以待天下
賢俊即詔度左升龍門東北車府地為三館既成

賜名崇文院以東廊爲昭文書庫南廊爲集賢書庫西廊爲史館書庫參以舊書爲六庫爲八萬卷官有史館修撰直史館集賢院直學士校理之名淳化中復置直昭文館直集賢院亦有修國史崇文院檢討編修皆無定員亦不常置

歸田錄

秘閣

本朝三館外復有秘閣圖書置直秘閣校理端拱元年詔置秘閣於崇文院之中堂

歸田錄

秘書監秘閣

淳熙元年李至等言曰王者藏書之府自漢置未央宮麒麟天祿閣在其中命劉向揚雄典校謂之

中書後漢藏之東觀亦在禁中至桓帝時始置秘書監掌禁中圖書秘記謂之秘書及魏以秘書屬少府故王肅爲秘書監論秘書不應屬少府魏之秘書即漢之東觀因是不屬少府而蘭臺亦藏書故薛夏知曰蘭臺爲外臺秘書爲內閣晉宋以還皆有秘書閣之號唐開元十三年因置集賢書院皆置之於內地陛下復建秘閣以藏奇書乞詔令與三館並列詔自今秘閣宜次三館

筆談

御書秘閣二字

淳化三年秘閣成太宗作贊賜之李至引唐秘書有薛稷畫鶴郎餘令畫鳳賀知章草書目爲三絕

又引蘇易簡乞御飛帛書玉堂爲比願賜新額以
光祕府戊辰賜御書飛帛書祕閣二字以賜李至
至又請以御贊刊名九月奉詔模勒刻石并刻孝
經筆談

熱修撰冷修撰

集賢院修撰舊多以館閣久次爲之近歲有自常
叅官未至從官者起授修撰有冷撰熱撰時人謂
熱中允不博冷修撰筆談

職近日月

魏王肅論祕書表曰祕書丞郎與博士議郎同職
近日月宜在三臺上職官分紀

承明金馬

又有承明金馬著作之庭班固西都賦云

乳媪

何承天除著作佐郎年已老而諸佐郎並少年荀
伯子嘲之呼爲妣母陳后山除正字有詩曰寧辭
乳媪譏用妣母事爲乳媪也南史

杜門與兄弟讀

晏殊爲館職時天下無事許臣寮擇勝燕飲侍從
文館士大夫燕集市橋酒肆皆供帳爲游息之地
公時貧甚不出獨居家與昆弟講習一日選東宮
官忽自中批除晏殊執政莫喻所因次日進覆上

曰近館職臣容無不嬉遊彌日繼夕惟晏殊與兄弟杜門讀書如此謹厚正可為東宮官對曰臣非不樂游宴者直以貧無可為具臣有錢亦須往上嘉其誠

郎官

懷香握蘭

尚書郎主作文書起草更直於建禮門內懷香握蘭趨走於丹墀上

漢官儀制

青練錦被

漢尚書郎給青練白綾被或以錦被

漢官儀

上應列宿

漢館陶公主為子求郎顯宗不許曰郎官上應列

宿出宰百里任非其人民受其害

漢紀

土山粉署

唐諸郎中不自負外郎拜者謂之土山頭趙謙先自彭州司馬入為大理正遷戶部郎中戶部負外賀遂涉詠曰負外由來羨郎中望不優寧知粉署裏翻作土山頭謙光荅詩曰錦帳隨情悅金爐任意薰唯愁負外置不應列星文

談賓錄

水鏡

樂廣為尚書郎何晏謂之水鏡

本傳

瑞錦窠

按唐舊說禮部負外郎號為瑞錦窠負外郎廳前有
大石諸州府送到廢印皆於石上碎之又圖寫
祥瑞亦負外廳所掌令狐楚元和初為禮部負外
郎有詩曰移石幾回敲廢印開箱何處送新圖春
明退朝錄

賜餐給帷被

樂崧為郎家貧獨直無被枕食糟糠帝夜入臺嘉
嘆自此制太官賜尚書以下朝夕餐給帷被袍及
侍史二人後漢本傳

古今難匹

唐魏鄭公薦杜正倫以古今難匹太宗擢為兵部

負外郎職官分紀

給女侍史執香爐護衣服

宋高祖並置尚書郎入直官供青練白綾被帷帳
檀褥太官供食物湯官供奉餅餌給女侍史二人
選端正者執香爐護衣服同上

丹墀赤館

尚書郎奏事明光殿殿以胡粉塗壁畫古賢烈女
以丹朱色地謂之丹墀赤館尚書口含雞舌香以
其奏對使氣息芬芳也丞郎月賜赤堯大筆一雙

麋墨一九同上

繁霜之任

郭璞讓尚書郎表云以幼弱之資充督責之官以無用之才管繁霜之任同上

先捧紫泥

武元衡罷相鎮蜀柳公綽與裴度俱為元衡判官公綽先入為吏部郎中度以詩別之有兩人同日事征西今日君先捧紫泥之句同上

南宮舍人

按唐舊說禮部郎中掌省中文翰謂之南宮舍人百日内須知制誥故王元之與宋給事詩云須知百日掌絲綸春明退朝錄

哀鳥郎位

前漢天文志南宮二十五星哀鳥郎位故明帝云郎官上應列宿也分紀

二十四郎

魏尚書郎有駕部金部虞部比部主客祠部等凡二十四郎一尚書領六郎也同上後漢有三十六郎

祠屯駕庫

省中語曰後行祠屯不博大行都門中行刑部不博前行駕庫南部新書

司門水部入省不數

尚書郎自兩漢之後妙選其人唐正觀以來尤重其職吏部尚書前行最為要劇自後行改入皆為

羨遷考功負外專掌貢舉負外郎之最望者也司門都官屯田虞水膳部王客皆在後行閑簡無事時人語曰司門水部入省不數王上客自侍御史常望前行忽除膳部負外郎悵惋張敬忠戲詠曰有嫌兵部職專心取考功誰知脚踏蹬幾落省墻東膳部在省東隅西京雜記

卿監

大理棘署棘寺

大理聽訟於棘木之下故云

廷尉司刑

秦置廷尉漢因之景帝改曰大理梁加卿字曰廷

尉卿北齊改曰大理卿唐初曰詳刑卿光宅初曰

司刑卿後皆復舊六帖

詳斷官判寺官

大理判寺官或一負兩負不定少卿一負以他官

權詳斷官十二負法直官一負以流內人任年滿

得京官湘山野錄

斷疑獄四百

張文瓘為大理卿不旬日斷疑獄四百抵罪者無

怨言本傳

形如死灰心若鐵石

唐臨為大理卿高宗嘗錄囚臨所訊無一言帝問

囚荅曰唐卿斷囚不寃所以絕意帝嘆曰為獄者當如是乃自述其考曰形如死灰心若鐵石臨傳

言若湧泉

唐戴胄為大理卿犯顏據正參處法意隨顏指摘言若湧泉本傳

議盜環

張釋之為廷尉有盜高廟玉環奏棄市上怒令族之釋之曰假令盜長陵一杯土何以加法乎帝乃止本傳

撼大木

隋趙綽為大理卿有刑部侍郎辛亶衣緋視俗云利官上以為厭蠱將斬之綽不奉詔上怒甚謂曰卿惜辛亶不自惜耶綽曰寧可殺臣不可殺辛亶至朝堂解衣將斬上謂意如何對曰執法一心不可惜死上拂衣入良久乃釋之時禁行惡錢易者令悉斬之綽曰當杖上曰不關卿事綽曰陛下不以臣愚置在法司欲妄殺人豈得不關上曰撼大木不動者當退對曰臣撼天心何止動木上遂聽侍御史諫乃止職官分紀

司農稼卿

初秦置治粟內史漢曰大司農梁曰司農卿隋唐因之龍朔中改曰稼卿後復舊五代史志

國泉

史游急就章司農少卿國之泉也 六帖

走卿

見下注又司農為走卿 分紀

穡臣

張華大農歲穡臣司農敢告左右 分紀

司均

揚雄司農歲曰農臣司均

太常奉常

初秦置奉常漢更曰太常常典三禮故曰太常或

曰太常者旌旗禮官持之故曰太常

客卿

奉常客卿兩虬鬚指喬太博為太常博士 坡詩注

赤車

太常行陵赤車乘 六帖

司禮寺

前太常古為司禮寺漢曰奉常

望省樓

唐崔日知歷職中外恨不居八座為太常卿於都
寺廳後起一樓與尚書省相望謂之崔公望省樓

宗正冷卿

宗正為冷卿謂其管玉牒所 坡詩注

不是卿

舊傳太常不是卿秘書不是監以其品列清重不與諸卿監侔耳 春明退朝錄

司宗司屬

成周曰宗正晉曰大宗正梁加卿字除大字曰宗正卿唐龍朔中改為司宗卿光宅初改為司屬卿 六帖

太府外府司府

太府周官也秦漢以下不置其職務在司農至梁始置太府唐龍朔中改為外府卿光宅初改為司府卿 六帖

尹卿筆

唐尹思慎為司府少卿時侯知一亦厲威嚴語曰不畏侯卿杖惟畏尹卿筆 職官分紀

將作監大匠卿

漢景帝以將作監為大匠卿

秘書監宰相病坊

舊傳太常卿不是卿秘書監不是監以其品列清重不與諸卿監侔耳唐士大夫多尚臺省不樂九列故目秘書監為宰相病坊少監為給舍病坊 春明退朝錄

大蓬

有人嘗為翰林學士語同列曰禁中視草非養病之地他日解職得遂大蓬之拜歸息數畝之園入就三品之列優游終老則為幸矣

春明退朝錄

月卿

卿士惟月書洪範

亞卿

少卿為亞卿

飽卿煖卿冷卿

世傳光祿為飽卿衛侯為煖卿鴻臚為睡卿司農為走卿宗正為冷卿暖謂其管儀鸞供帳之類冷謂管玉牒所也

坡詩注

春夏秋冬

梁以太常司農宗正為春卿太僕太府為夏卿衛尉廷尉大匠為秋卿光祿鴻臚為冬卿以象四時

初學事記注

九列

唐室士大夫多尚臺省官不樂九列

春明退朝錄

九棘

九卿皆樹棘為位

周禮

桃花三彩綬

漢官儀曰卿秩中二千石綬青純桃花三彩

初學記注

法河海

三公象五岳九卿法河海後漢注又李淑諫更始曰夫三公上應台宿九卿下括河海取官分紀

史官

當國之鑑億代之眉目

唐朱鵠聖政記頌曰史臣者是當國之鑑千億代之眉目也唐文粹

柱史星

極東一星曰柱下史主記過古者左右史之象也晉志

三長

唐鄭淮忠問劉知幾曰自古文士多史才少何耶

荅曰史有三長才學識世罕兼之有學無才猶愚

賈操金不能殖貨有才無學猶巧匠無榘楠弗能成室知幾傳

權重宰相

韋安石曰世人不知史官權重於宰相宰相但能制生人史官兼制生死古今聖君賢臣所以畏懼也朱敬則傳

左氏叙事

左氏述行師則簿領盈視叱聒沸騰論備人則區分在目修飭峻整言勝捷則收獲都盡記奔敗則披靡莫前申盟誓則慷慨有餘稱欺詐則欺誣可

見談恩惠則照如春日記嚴烈則凜若秋霜叙興
邦則滋味無量陳亡國則淒涼可閔或腴辭潤簡
牘或羨句入詠歌跌宕而不羣蹤橫而自得工俾
造化思涉鬼神史通

班馬

張輔著班馬優劣論云遷叙三千年事唯五十萬
言固叙二百四十年乃八十萬言是知班不如馬
也史通

學左史

左氏叙晉敗于邲上軍下軍爭舟舟中之指可掬
不言攀舟亂以刃斷指而意可見王之邵齊志述
高季式破敵於韓陵追奔逐北而云夜半方歸槩
血滿袖亦不言擊刺甚多而意可見史通

時政記

梁周翰為史館修撰上疏自今崇德長春二殿皇
帝之言侍臣論列之事望令中書修為時政記其
樞密院機密亦令本院修纂至月終送史館從之
玉壺清話

獻唐鑑

范祖禹在書局分職唐史考其成敗治亂之迹撮
其機要論次成書名曰唐鑑欲獻之神宗未及上
元祐五年上表進其書家傳

修唐書

慶曆四年賈昌朝建言修唐書令在館學士日供唐書外事二件分付本傳至五年始命王堯臣宋祈張方平爲修撰曾公亮范鎮爲編修其後相繼出外獨宋祈下筆祈又出皆將藁草自隨或有疑難移文往復至和元年范鎮乞歐陽脩修紀志詔從之又命劉義叟修天文律曆志梅堯臣修方鎮百官志又唐志雖歐公修而天文律曆五行志則劉義叟爲之方鎮百官表則梅堯臣爲之禮儀兵志則初出於王景彛業未竟而卒

編年

五代史

歐公五代史其法甚精發論必以嗚乎曰此亂世之書也吾用春秋之法師其意不襲其文其論曰昔孔子作春秋因亂世而立法余述本紀以治法而正亂君書滅舊史之半而事迹比舊史添數倍議者以謂功不下司馬遷又謂筆力馳騁上下無駁雜之說至於紀例精密則遷不及也亦嘗自謂我伶官傳豈下滑稽也邪遺事

特書不一書

微之足下辱書論甄逢父子識祿山必反即詐暗棄去足下與逢父子俱宜牽連得書足下勉逢令終始匪躬足下身尚強嗣德有繼將大書特書屢

書不一書而已也

韓書

置之館殿得宜

太宗曰揚徽之操獲無玷理郡非其所長置之館殿正得其宜用為修撰

職官分紀

事同辭異

班固畏司馬遷之辭不敢輒易自武帝之下緒成之可也於其辭重出不可也孔子作經使後世讀易者如無春秋讀書者如無詩其法班固不知也獨韓退之作王仲舒碑又作誌蘇子瞻作司馬君實行狀又作碑其事同其辭異其蓋知之矣

邵氏錄

天子自作史

蕭大圜為滕王友王嘗問曰吾聞湘東王作梁史有之乎曰言之妄也如使有之亦不足恠昔漢明作世祖紀章帝為顯宗紀殷鑒不遠足為成例安得而不隱文禮也

職官分紀

竹管子向口頭褒貶

富韓公書曰彌嘗病今之作文字無所發明但模稜依違而已人之為善不易人之為惡必用奸謀以逃刑戮君子為小人所勝不過祿位耳惟有三四寸竹管子向口角頭褒善貶惡使善者貴惡者賤須是由我始得不可更有畏怯也

邵氏聞見錄

賈鐵嘴

五代周賈緯無修撰才長於記誦文章未能過人而議論剛強儕類不平目之為賈鐵嘴五代史

猥稱賜威鳳賦

許敬宗子娶尉遲敬德女孫太宗賜長孫無忌威鳳賦至敬宗修國史猥稱以賜敬德敬宗傳

作佳傳謝德

魏收在齊神武時修國史德揚休之助因謝揚休之曰無以謝德當為卿作佳傳休之父固為北平太守以貪獲罪收乃書固為北平甚有惠政坐公事免職官分紀

千斛米

魏丁儀丁冀有盛名陳壽作三國志謂其子曰可遺千斛米當為尊公作佳傳不與竟不作傳壽傳

改易舊字

裴景仁秦記稱符堅方食撫盤而訴王邵齊志述受洛干感恩脫帽而謝及彥鸞撰新史易撫盤以推案變脫帽為免冠夫近世通無按食胡俗不施冠冕學者可以考信史通

陳壽論孔明

毛脩之曰陳壽曾祖為諸葛亮門下書佐得罪撻百下故其論武侯謂應變非其所長北史本傳
銀八千鎊

賈緯修晉高祖史出帝實錄以示徐台符初桑維翰為相常惡緯為人待之甚薄緯為維翰傳言維翰死有銀八千鎊徐台符以為不可數以非緯緯不得已更為數千鎊

本傳

立石銘

北魏崔浩等叙國事三十卷令閔堪請立石銘載國書以彰直筆遂營天郊東三里方百步用工三百萬浩書國事備而不典而石銘顯在道路北人咸悉忿毒相與讒浩於太武帝帝大怒族誅之

本傳

崔浩評諸葛亮

亮之相備英雄奮發之時君臣相得而不能與曹氏爭天下委棄荊州退入巴蜀此策之下者也可與趙佗為偶而以管蕭為亞匹不亦過乎

北史

班彪論司馬遷

至於採摭經傳分散百家之事甚多踈略不知其本務以多聞廣識為功論議切而不篤其論術孝則崇黃老而薄五經序殖貨則輕仁義而羞貧賤道游俠則賤守節而貴俗功若序司馬相如李郡縣著其字至蕭曹陳平之屬董仲舒並時之人不紀其字或縣而郡蓋不服也

彪傳

范曄論遷固

議者咸稱二子有良史之才遷文直而事覈固文

賸而事詳若固之序事不激詭不抑抗賸而不穢
詳而有躰使讀者疊疊而不厭信哉其能成名也
然其論議常排死節否正直而不叙殺身成仁之
為美則輕仁義而賤守節愈矣固傳

柳冕論司馬遷

柳冕謂宇文生云仲尼因舊史修春秋所記不過
二百四十年今子長乃軼孔子而修數千年荒絕
之助以黃老寓托之說仲尼之所二子長之所一
仲尼之所難子長之所易遷雖不得聖人之道而
繼聖人之志不得聖人之才而得聖人之旨自以
謂命世而生亦信然也文粹

見陳壽所作壞已書

夏侯湛等作魏書見陳壽所作遂壞已書職官分紀

穢史

魏收撰魏史衆口喧然號穢史職官分紀

東宮官

首宿盤

唐薛令之為東宮侍讀時官僚簡淡以詩自悼云
朝日上團團照見先生盤盤中何所有首宿長攔
干飯澁匙難滑羹稀筋易寬只可謀朝夕何由保

歲寒

唐宋詩話

放麋

孟孫獵得麇使秦西巴持歸其母隨之啼秦西巴不忍而與之孟孫歸求麇荅曰余弗忍而與其母孟孫怒逐之三月復召以爲子傳其御曰曩罪之今召之何變也孟孫曰夫不忍麇又且忍吾子乎

韓非子

千牛衛身

謝綽宋拾遺千牛刃即防身刀也義取庖丁解牛若新發刃以爲備身刀也故曰千牛衛身

職林

先馬

先馬負秩比謁者如淳曰前驅也國語云勾踐爲夫羞先馬或爲洗

前表

詹事

張說女嫁盧氏嘗求官說指支床龜女欣然告其夫曰得詹事矣果然

朝野僉載

熱中允

舊曰中允惟老於幕官者累資方至近歲州縣官進用者多除中允遂有冷中允熱中允

筆談

兩學官

璧池璧沼學省

歸崇敬言古天子學曰辟雍以制言之水環繞如璧然以誼言之以禮樂明和天下云爾故前世或曰璧池或曰璧沼亦言學省

本傳

國子學

晉武帝臨辟雍行鄉飲禮立國子學以殊士庶大業中更名國子監本傳

成均

國子監

六帖

虎闈

王融謂國子監為虎闈

宣室志

司成成均

唐正觀改國子學為國子監後又改國子監為司成館垂拱改國子監為成均祭酒一人司業二人

國子太學廣文四門律書算凡七學唐百官志

祭酒

禮飲酒必祭先示有先也故稱祭酒時惟尊長以

酒沃酌

應邵漢官儀

摠華清

左蟬右貂

侍中左蟬右貂本秦相史來往殿中故謂之侍中分掌乘輿服物孔安國為侍中以其儒者特聽掌御唾壺朝廷榮之至東京屬少府出則一人負傳

國璽操斬蛇劍

獻帝紀注

貂蟬

侍中帶蟬貂金冠金取堅蟬取潔貂取溫也

後漢志

鷓鴣冠

侍中皆冠鷓鴣冠戰國策云秦始皇破趙得之以賜侍中前志

八貂

散騎常侍掌規諷過失唐顯慶中分左右隸中書門下省金蟬珥貂左散騎與侍中為左貂右散騎與中書令為右貂謂之八貂唐志

朝夕論思

朝夕論思日月獻納班固兩都賦序

周旋吐納

孫奭約與來濟言志奭約曰得為舍人在殿中周旋吐納可也後濟為吏部奭約始入調濟曰如志遂擬通事舍人唐高智周傳

金華進講

金華殿名也前翼奉傳

玉笋班

唐末朝士中有人物者時號玉笋班清緊不雜又外郎班清流中不雜亦號玉笋班北夢瑣言

鸞掖

看封諫草歸鸞掖尚賁衡門待鶴書李義山詩

鸞遊蘭渚

傳咸贈何邵王濟二人詩雙鸞遊蘭渚注蘭渚比

中書也

文選

三清府

陳時謂散騎常侍為三清府

通典

詩

掖垣竹埤梧十尋洞門對雪常陰陰落花遊絲白日靜鳴鶴乳燕青春深腐儒衰晚謬通籍退食遲回違寸心杜甫星臨萬戶動月傍九霄多不寢聽

金鑰因風想玉珂明朝有封事數問夜如何同上

畫刻傳呼淺春旗簇仗齊退朝花底散歸院柳邊

迷樓雪融城濕宮雲去殿低避人焚諫草騎馬欲

雞棲同上閶闔初開瑞霧中丹霞曉日上蒼龍鳴

鞭響徹節千步珮玉聲趨戟百重雪後朝寒尤凜

冽柳梢春意已蒙茸少年自得芳菲侶老病惟添

睡思濃歐公宮柳街槐綠未齊春陰不解宿雲低

輕煙漠漠侵駝褐小兩班班祚燕泥 槐柳依依

禁籞長初寒人意自淒涼鳳城斜日留殘照玉闕

浮雲結夜霜老負漁竿貪國寵病須搏酒送年光

歸來解帶西風冷衣袖由霑玉案香同上秘殿崔

嵬拂彩霓曹司今在殿中西賡歌太液翻黃鵠從

獵陳蒼獲碧雞曉飲豈知金掌迥夜吟應訝玉繩

低鈞天雖許人間聽閶闔門多夢自

錦繡萬花谷卷第十二



